

四庫全書

史部

欽定四庫全書

欽定續通志卷六百二十五

叛臣傳

金

張覺

僅言

耶律伊都

伊喇幹罕

國用安

時青

張覺亦作穀平州義豐人遼進士仕至遼興軍節度副使太祖定燕京時立愛以平州降改南京以覺為留守

既而聞覺有異志遣劉彥宗及薩布諭之太祖每收城邑徙民實京師民心多怨及以燕京與宗而遷其人道出平州覺因之以作亂天輔七年五月殺左企弓虞仲文曹勇義康公弼等遂據南京叛納款於宋覺兵五萬屯潤州近郊欲脅遷來潤隰四州棟摩自錦州往討之再敗覺兵復戰于兔耳山棟摩大敗覺報捷于宋宋建平州為泰寧軍以覺為節度使宗望軍至南京城東覺兵大敗奔宋入燕京宗望以納叛責宋索張覺宣撫王

安中匿之於甲仗庫給曰無之宗望索愈急安中乃斬
貌類覺者一人當之金人識之曰非覺也安中不得已
引覺出數以罪覺罵宋人不容口遂殺覺函其首以獻
子僅言在襁褓里人劉承宣得之養於家其鄰韓夫人
甚愛之年數歲隨見貞懿皇后留之藩邸稍長侍世宗
讀書使主家事絕檢部曲一府憚之世宗即位除內藏
庫副使僅言能心計世宗倚任之嘗曰一經僅言無不
愜朕意者遷少府監護作太寧宮引宮左流泉溉田歲

獲稻萬斛遷勸農使僅言雖舊臣出入左右然世宗終不假以權任尚書省奏宮苑司直長黎倫在職十六年請與遷叙帝曰此朕之家臣質直人也今已老矣如勸農使張僅言亦朕舊臣純實頗解事凡朝廷議論內外除授未嘗得干預朕觀自古人君為讒諂蒙蔽者多矣朕雖不及古人然近習儉言未嘗入耳宰臣曰此國家之福也僅言得疾猶扶杖視事及卒帝深惜之贈輔國上將軍

耶律伊都遼宗室子初太祖起兵遼人來拒伊都請自
効以功累遷金吾衛大將軍為東路都統天輔元年與
耶律瑪格軍於渾河尼楚赫希尹拒之伊都等不敢戰
遁去二年龍化州人張應古等來降伊都復取之四年
按金史本紀天輔四年上自將伐遼至上京留守托卜
嘉以城降詔諭遼副統伊都五年伊都詣咸州降又考
遼史天慶十年金攻上京留守托卜嘉率衆降保大元
年伊都叛入金本傳統敘於天輔二年之下今據增
太祖已取臨潢府賜詔伊都曰汝前後戰未嘗不敗今
聞收合散亡以拒我師朕已克上京今將往取遼主矣

汝若治兵決勝負可指地期日相報若知不敵當率衆
來降無貽後悔五年伊都送款于咸州路都統以所部
來降帝撫慰之遂賜坐班同宰相自伊都降益知遼虛
實都統果取中京伊都為鄉導與希尹等招撫奚部奉
聖州降遷太常少卿久之耶律瑪占告伊都烏舍道拉
結黨謀叛按太祖紀告耶律瑪占伊都等謀叛者為都
統果與此敘瑪占事順逆迥異未知孰誤
帝召伊都謂曰今聞汝謀叛誠然邪其各無隱若果去
必須鞍馬甲冑器械之屬當悉付汝吾不食言若再被

擒無祈免死欲留事我則無懷異志吾不汝疑伊都等
戰慄不能對乃杖道拉七十餘皆不問天會三年大舉
伐宋伊都為元帥右都監宋兵四萬救太原與沃哩赫
逆擊於汾河北擒其帥郝仲連張闕索統制馬忠殺萬
餘人宗翰伐宋伊都留西京十年謀反亡去邊部斬伊
都及其諸子函其首以獻

伊喇斡罕西北路契丹部族先從薩巴為亂薩巴者初
為招討司譯史海陵伐宋使牌印素赫楊格盡徵西北

路丁壯契丹人曰西北路接近鄰國世世征伐為讐若
男丁盡從軍彼兵來老弱必盡係累矣幸使者言之素
赫畏罪不敢言楊格懼後有事得罪憂死素赫督起兵
於是薩巴殺招討使烏色及素赫而反山後山前諸羣
牧皆應之廸幹羣牧使圖克坦賽哩伊囉幹羣牧使鶴
壽等皆遇害咸平府穆昆瓜里白山後逃歸少尹完顏
額哩頁欲收捕其家屬瓜里與其黨招誘富家奴隸得
衆二千遂攻陷韓州及柳河縣據咸平自濟州趨京至

長安縣聞空中擊鼓聲如數千鼓者又見旌旗蔽野時
世宗為東京留守以兵四百人拒之傳言以十萬兵至
即引還合於薩巴海陵使樞密使布薩呼圖西京留守
蕭懷忠將兵與右衛將軍蕭圖喇討之連戰皆無功糧
餉不繼圖喇退歸臨潢薩巴度大軍繼至謀歸達實乃
率衆沿龍駒河西出布薩呼圖等坐逗遛不即追賊皆
誅死薩巴既西行而舊居山前者皆不欲往幹罕遂與
辰嘉殺薩巴自為都元帥擁衆東還至臨潢府新羅寨

世宗使伊喇扎巴等招之幹罕已約降扎巴見幹罕兵衆彊車帳滿野因反說曰我之始來以汝輩不能有爲今觀兵勢彊盛如此若果有大志吾亦不復還矣賊將綽哈言昔古紆丞相嘗說他日西北部族當有事今正合此語恐不可降也幹罕意遂決扎巴亦留乃引兵攻臨潢府衆至五萬正隆六年十二月己亥遂稱帝改元天正是時世宗即位使元帥左都監烏哲庫同知北京留守事完顏果濟救臨潢晝夜兼行比至賊已解圍去

攻泰州押軍明安烏克遜阿里布力戰擊賊賊乃退走
城賴以完大定二年正月右副元帥完顏默音率諸軍
北征幹罕自泰州往攻濟州欲邀糧運默音與右監軍
完顏福壽左都監烏哲庫合兵圍克坦克寧等為左翼
赫舍哩志寧等為右翼至珠格崖盡委輜重齎數日糧
輕騎襲之契丹吉勒扎來降知賊輜重相去僅八十里
用其計乘夜亟發遲明與賊近整兵少憩幹罕知之即
還救過於長樂賊騎突出左翼間圍克坦克寧設伏射

却之萬戶襄別與賊戰賊陣動麾軍乘之突出其後賊不能支遂却襄與大軍合整陣力戰忽反風揚砂石賊陣亂官軍馳擊大破之幹罕率衆西走追及於霽霖河賊已濟毀其津口赫舍哩志寧軍先至不克渡乃對岸為疑兵於下流渡河值支港兩岸斗絕且渾渚命軍士束柳填港而過賊衆奄至志寧整陣力戰流矢中左臂大軍畢至賊據上風縱火乘烟擊官軍官軍併力合戰會天降雨風止奮擊大敗之圖克坦克寧追奔十五里

渡溪澗賊反旆來攻大軍至賊遂引去默音不復追討
駐軍白濛幹軍攻懿州不克遂殘破川州將遜於山西
詔發驍騎等軍四萬元帥左都監高忠建總兵烏庫哩
芬徹烏凌阿薩喇宗寧等皆為萬戶宗亨為北京路都
統完顏達吉為副統會元帥府討擊之以赫舍哩志寧
為元帥右監軍尚書右丞布薩忠義願効死力除邊患
拜平章政事兼右副元帥宗叙為兵部尚書宗尹為河
南路統軍使富察世傑為西北路副統從忠義征行罷

默音為同判大宗正事又以完顏思敬為都統將兵五千會燕子城時幹罕西走和托衆尚八萬忠義高忠建軍與賊遇萬戶扎拉芬徹為左翼宗亨統之宗寧薩喇為右翼宗叙統之夾河為陣賊渡河以兵四萬餘先犯左翼軍扎拉奮擊敗之以四萬衆與右翼軍戰宗亨世傑指畫失宜陣亂宗叙以右翼軍來救賊乃去忠義志寧以大軍追及於諾爾嶺西陷泉先據南岡左翼軍自岡為陣逆還而北步軍繼之右翼軍繼步軍北引而東

作偃月陣步軍居中騎兵據其兩端使賊不見首尾賊
擊右翼軍烏雅扎拉力戰賊稍却志寧與瓜爾佳清臣
烏凌阿薩喇道拉合戰賊大敗大軍逐北人馬相蹂踐
死陷泉皆平俘斬萬計生擒其弟大王諾爾幹罕僅與
數騎脫去偽節度使六及其部族皆降幹罕收合散卒
萬餘人遂入奚部以諸奚自益時時出兵寇蘇勒庫淀
古北口興化之間詔完顏默音富察烏哩頁富察富埒
瑄禦之完顏思敬以所部兵會討高忠建破奚於栲栳

山及招降旁近六營

按諸將平幹軍功具見本傳獨高忠建未載茲據本紀補謹識

時賊將降者甚衆餘多疫死無復鬪志幹軍勢窮謀自羊城道西奔夏國追益急衆多亡去乃北走沙陀志寧獲賊朔和卓釋弗殺縱還賊中與錫勒塔干執幹軍詣思敬降并獲其母蘇尼及其妻子追餘黨悉獲之獻俘京師幹軍集首於市磔手足分懸諸京府其母及妻子皆戮之瓜里扎巴率衆南走宗亨追及之扎巴詐稱降宗亨信其言不與戰扎巴紿曰瓜里驚走願追之縱去

遂奔於宋後宋李世輔用之頗為邊患

國用安先名安用本名咬兒淄州人紅襖賊黨也歸元為都元帥行山東路尚書省事天興元年徐州埽兵總領王祐義勝軍都統豐紳總領張興等作亂安用率兵入徐斬張興以豐紳主徐州既而徐邳海三州皆歸安用元將阿勒楚爾聞之大怒遣張進等率兵入徐欲圖安用安用懼劫殺張進乃會山東諸將及徐宿邳主帥刑馬結盟誓歸金既盟諸將皆散去安用遂同王德全

劉安國託從宜衆僧努自通於朝廷衆僧努奏安用以數州反正功甚大且其兵力強盛國家果欲倚用非極品重權不足以堅其心未報安用率兵攻海州未至衆稍散去安國因勸赤心歸國安用亦自知反復失計於是復金朝衣冠未幾朝廷遣近侍局直長因世英都事高天祐持詔至邳以安用平章政事兼都元帥京東山東等路行尚書省事特封充王錫姓完顏改名用安用安始聞使者至猶豫未決出見使者跪揖如等夷坐定

語曰予向隨元兵攻汴嘗於開陽門下與侯摯議內外
夾擊朝廷無一人敢決者若從吾計出軍中興久矣今
日悔將何及言竟而起既而選人取賜物遍觀之喜見
顏色設宴拜授如朝儀遣主事常謹奉表入謝帝復遣
世英天祐賜以鐵券虎符龍文衣玉魚帶弓矢封贈其
父母妻語命及郡王宣世襲宣信牌玉兔鶻帶各十聽
同盟可賜者賜之用安迎受始有入援意聞帝將遣蔡
州遣人以蠟書言六不可莫如權幸山東山東富庶甲

天下東連沂海西接徐邳南扼盱楚北控淄齊若鑾輿少停臣仰賴威靈河朔可傳檄而定帝以示宰臣奏用安反覆本無匡輔志議遂寢初世英等過徐王德全劉安國說留郡王宣世襲宣王帶各二由是與用安有隙又懼為所圖皆不聽其節制用安必欲取山東累徵徐宿兵不應用安怒令杜政豐紳以取糧為名襲徐宿德全覺之就留不遣會詔徵兵東方故用安假朝命聲言入援檄劉安國為前鋒親率兵駐徐州城下招德全德

全終不出安國既至宿州用安復召還安國不從獨與
衆僧努赴援用安使人劫殺之遂攻徐州不下退歸漣
水因世英以用安終不赴援乃還朝至宿州遇元兵不
屈而死事聞贈汝州防禦使既而用安軍乏食乞糧於
宋宋陽許之即改從宋衣元東平萬戶扎拉至漣水遂
降復叛歸宋元兵圍沛用安往救之敗走徐州會移兵
攻徐用安投水死

時青滕陽人與叔父全俱為紅襖賊承赦來降興定初

青為濟州義軍萬戶全為行樞密院經歷二年全馳驛
過東平青來見告將叛入宋全秘之宋人置之淮南屯
龜山有衆數萬四年泗州行元帥府赫舍哩約赫德遣
人招之青以書來乞赦罪假邳州屯兵當襲取盱眙盡
定淮南以贖昔過約赫德為奏其事詔封滕陽公本處
兵馬總領元帥兼宣撫使青潛表陳謝復請邳州不得
仍為宋守五年青夜襲破泗州西城提控王祿遇害是
時時全為同簽樞密院事朝廷不知止稱宋人詔全往

督兵取之全至獲紅襖賊詰問知青所為遂殺其人以
滅口約赫德晝夜力戰提控鄂爾多設伏掩擊青兵大
敗流矢中其目夜拔衆走遂復西城元光元年全與元
帥左監軍額爾克伐宋由潁壽渡淮敗宋人於高塘市
攻固始縣破宋廬州將焦思忠兵時青受宋詔與相拒
全匿其事兵還距淮二十里諸軍將渡全矯稱密詔留
收淮南衆惑之額爾克謂全曰今淮水淺狹可以速
濟若暑雨暴漲宋乘其後不得歸矣全力拒之夜大雨

明日淮水暴漲乃為橋渡軍宋兵襲之橋壞全以輕舟
先濟士卒皆覆沒宣宋乃下詔誅之

欽定續通志卷六百二十五

欽定四庫全書

欽定續通志卷六百二十六

叛臣傳

元

李璫

王文統

阿勒呼木特穆爾

李璫小字松壽濰州人李全子也或曰璫本衢州徐氏子父嘗為揚州司理參軍全養之為子太祖十六年全叛宋舉山東州郡附元太師國王博囉承制拜全山東

淮南楚州行省而以其兄福為副元帥太宗三年全攻
宋揚州敗死璵襲益都行省得專制其地朝廷數徵兵
輒詭辭不至憲宗七年調其兵赴行在璵親詣帝言益
都乃宋航海要津分軍非便帝然之命歸取漣海數州
璵遂發兵攻拔漣水相連四城大張尅捷之功世祖即
位加江淮大都督璵言近獲生口知宋調兵將攻漣水
且謀見許浦射陽湖舟艦相望勢欲出膠西向益都請
繕城塹為備詔出金符十銀符五授之賞將士凡蒙古

漢軍之在邊者咸聽節制壇復揚言宋呂文德合淮南兵七萬五千來攻連水且規築堡以臨我及得賈似道呂文德書辭甚悖傲知朝廷近有內顧憂必將肆志於我乞選將益兵臣當帥先渡淮以雪慢書之辱執政得奏諭以朝廷方通和議邊將惟當固守封圉且南人用間其詐非一彼既不至毋或妄動壇因上將校馮泰等功狀詔出益都官銀分賞之中統二年正月壇言於行省謂宋人聚兵糧數十萬列艦萬三千艘于許浦以侵

內郡而宣撫司轉輸不繼恐一日水陸道絕緩急莫報
請選精騎倍道來援表裏協攻乘機深入江淮可圖也
既而來獻漣水捷詔復加獎諭仍給金符十七銀符二
十九增賜將士璫輒發兵修葺都城塹且報宋人來攻
漣水詔遣阿實克布哈等悉兵赴援璫遂請節制諸道
所集兵馬且請益軍器詔給矢十萬三年四月又以賈
似道誘總管張元張進等書來上

按李璫獲書事元世祖紀作三年正月與

此蓋璫專制山東者三十餘年前後所奏數十事皆悞

疑虛喝挾敵國以要朝廷而自為完繕益兵計初遣其子彥簡質於朝而潛為私驛自益都至京師質子營至是彥簡用私驛逃歸瓊遂反以漣水三城獻於宋穢蒙古戍兵引麾下具舟艦還攻益都入之發府庫以犒其黨尋寇蒲臺民間瓊反皆入保城郭或奔竄山谷自益都至臨淄數百里寂無人聲下詔暴其罪命諸軍討之瓊盜據濟南復命史樞阿珠帥師前往瓊帥衆出掠輜重將及城官軍邀擊大敗之瓊退保濟南五月築環城

圍之璫自是不得出猶日夜拒守取城中子女賞將士以悅其心且分軍就食民家盡發其蓋藏不足則家子之鹽令殺人為食于是人情潰散各什伯相結絕城出降璫知城且破乃手刃愛妾乘舟入大明湖自投水中水淺不得死為官軍所獲縛至諸王哈必齊帳前丞相史天澤請速誅之以安反側遂與蒙古軍官囊嘉特并誅焉

王文統字以道益都人少時讀權謀書好以大言撼人

遍于諸侯無所遇乃往見李瓊瓊與語大悅留置幕府
命其子彥簡師事之文統即以女妻瓊由是軍旅之事
咸與諮決歲上邊功虛張敵勢以固其位用官物樹私
恩取宋漣海二郡皆文統謀也世祖即位有薦其才智
者亟召用之命為平章政事妻以更張庶務建元為中
統立十路宣撫司示以條格欲差發辦而民不擾鹽課
不失常額文鈔無致阻滯更造中統元寶文鈔立互市
于潁州漣水光化軍

按大方通鑑云文統初造通行文鈔以絲為本以革諸路行用鈔法

之弊其法以銀五十兩易然鈔千兩繼造中統通行元寶每一貫同交鈔一兩兩貫同白銀一兩未及行而罷本傳未載

明年二月世祖在開平召行中書省事瑪穆

特與文統親率各路宣撫使赴闕世祖自去秋親征叛王額呼布格于北方凡民間差發宣課鹽鐵等事一委文統裁處及振旅還宮未知可否故召文統等至責以成效復頒所議條格于各路申嚴私鹽酒醋麪貨等禁信任倍專文統為人思刻初立中書省張文謙為左丞文謙素以安國利民自負凡議論建白輒相可否文統

積不能平思有以陷之文謙竟以本職行大名宣撫事
去姚樞實默許衡皆世祖所敬信者文統諷世祖授三
人為太子師傅官外佯尊之實不欲使朝夕備顧問也
默嘗與王鶚及樞衡同侍世祖面詆文統曰此人學術
不正必禍天下不可處以相位世祖曰若是則誰可為
者默以許衡對世祖不悅而罷文統內不自安潛蓄異
謀及李璵反人言文統嘗遣子莧與璵通音耗世祖召
問曰汝教璵為逆積有歲年舉朝皆知之朕今問汝所

謀云何文統曰容臣悉書以上書畢命讀之有曰螻蟻之命苟獲存全保為陛下取江南世祖曰汝今日猶欲緩頰于朕耶會得文統與璫書帝示之始錯愕駭汗命左右斥出就縛立召竇默姚樞王鶚僧子聰及張柔等至示以前書曰汝等謂文統當得何罪文臣皆言人臣無將將則必誅柔獨疾聲大言曰宜剗世祖曰汝等同辭言之諸臣皆曰當死世祖曰渠亦自服朕前矣文統乃伏誅子堯井就戮文統雖以反誅而元之立國規模

法度世謂多出其手云

阿勒呼木特穆爾太宗八世孫也襲封陽翟王順帝初
立阿勒呼木特穆爾進曰天下事重宜委宰相決之庶
可責其成功若躬自聽斷必負惡名帝信其言由是添


居宮中每事無所與至正二十年

自陽翟王至此一段
據順帝本紀增謹識

汝穎盜猖獗天下震動帝屢詔宗王以北方兵南討阿
勒呼木特穆爾乘間擁衆數萬屯穆爾古珠之地魯宗
王以叛將犯京畿遣使來言于帝曰祖宗以天下付汝

汝何故失其大半盍以國璽授我我當自為之帝曰天命有在汝欲為則為之降詔開諭俾其悔罪不聽乃命知樞密院事圖沁特穆爾等討之行至青海起哈喇齊萬人為軍其人素不習戰既陣兵未交皆解甲奔敵中圖沁特穆爾軍敗單騎還上都明年更命少保知樞密院事婁章以兵十萬擊之且令阿勒呼木特穆爾之弟呼圖克特穆爾從征大敗其衆阿勒呼木特穆爾謀東遁為部將托歡所擒送闕下帝命誅之仍以呼圖克特

穆爾襲封陽翟王加婁章和寧王崩北行省丞相俾鎮
北藩



欽定續通志卷六百二十六

欽定四庫全書

史部

欽定續通志卷六百

二十七至
三十

侍講學士_臣羅國俊覆勘

總校官原任侍講_臣王燕緒

欽定四庫全書

欽定續通志卷六百二十七

逆臣傳

唐

臣等謹案逆臣分類亦仿自新唐書宋遼金元各
史因之考鄭志列傳如莽卓輩皆列諸臣之末蓋
依史書舊文然臬鑿並載終覺混淆此等覆載不
容之人允宜別而出之以著斧鉞綦嚴之義今並

以類為次五代史無逆臣傳茲詳考事實併為補編焉

安祿山

高尚孫孝哲

史思明

安祿山營州柳城人也本姓康

舊書云本無姓氏

母阿史德為

現居突厥中禱子於軻嶺山突厥所謂鬪戰神者既而妊及生有光照穹廬野獸盡鳴望氣者言其祥范陽節度使張仁愿遣搜廬帳欲盡殺之匿而免母以神所命遂字軻嶺山少孤隨母嫁突厥將安延偃因冒其姓開

元初延偃攜以歸國與將軍安道買亡子偕來故道買

子安節

舊書作
安貞節

厚德延偃約兩家子為兄弟乃更名祿

山及長伎忍多智善測人情通六蕃語與史思明俱為

捉生嘗以五騎擒契丹數十人幽州節度使張守珪異

之拔為偏將討奚契丹叛者輕進而敗守珪奏斬之祿

山臨刑呼曰公不欲滅兩蕃邪何殺我守珪惜其勇更

執送京師張九齡奏祿山面有反相請因罪誅之帝曰

卿勿以王夷甫識石勒枉害忠良竟赦之

按新舊書並
載祿山以通

蕃語為五市郎盜羊事發守珪欲誅之通鑑胡三省注歷引玄宗實錄張九齡傳及九齡集力辨其誤今據改

正後以平盧兵馬使擢特進幽州節度副使於是御史

中丞張利貞採訪河北祿山百計諛媚賄結左右利貞

入朝盛言祿山能乃授營州都督平盧軍使順化州刺

史押兩蕃渤海黑水四府經畧使

按通鑑祿山兼四府經畧在開元二十九

年原傳作天寶元年事今改使者往來皆中以賂交口薦譽玄宗始

才之天寶元年分平盧為節度以祿山為之使兼柳城

太守明年入朝奏對稱旨進驃騎大將軍三載代裴寬

為范陽節度河北採訪使仍領平盧軍祿山北還詔中書門下尚書三省正員長官御史中丞饒鴻臚亭四載奚契丹殺公主以叛祿山幸邀功肆侵掠於是兩蕃貳祿山起軍擊契丹還奏夢李靖李勣求食於臣遂命立廟又奏廟梁產芝其詭誕如此時宰相李林甫嫌儒臣以戰功進尊寵間已乃請頗用蕃將故帝寵祿山益牢羣議不能輒楊貴妃有寵祿山請為妃養兒帝許之其拜必先妃後帝帝怪之答曰蕃人先母後父帝大悅命

與楊鈺及三夫人約為兄弟繇是祿山有亂天下意令
麾下劉駱谷居京師伺朝廷隙六載進御史大夫封妻
段為夫人晚益肥腹緩及膝奮兩肩若挽牽者乃能行
作胡旋舞帝前乃疾如風帝視其腹曰胡腹中何有而
大答曰唯赤心耳帝為起第京師以中人督役備極華
侈時太平久人忘戰帝春秋高嬖豔鉗固李林甫楊國
忠更持權綱紀大亂祿山計天下可取逆謀日熾每過
朝堂龍尾道南北睥睨久乃去更築壘范陽北號雄武

城峙兵積穀養同羅奚契丹降者八千人為假子教家
奴善弓矢者數百畜單于護真大馬三萬牛羊五萬引
張通儒李廷堅平洌李史魚獨孤問俗署幕府以高尚
典書記嚴莊掌簿最阿史那承慶安太清安守忠李歸
仁孫孝哲蔡希德牛廷玠向潤客高邈李欽湊李立節
崔乾祐尹子奇何千年武令珣能元皓田承嗣田乾真
皆拔行伍署大將潛遣賈胡行諸道歲輸財百萬陰令
羣賈市錦綵朱紫服數萬為叛資月進牛橐駝鷹狗奇

禽異物以盡帝心自以無功而貴見天子盛開邊乃給契丹諸酋大置酒醉而殺之先後數千人獻馘闕下帝不知賜鐵券封柳城郡公又贈延偃范陽大都督進祿山東平郡王九載兼河北道採訪處置使賜永寧園為邸入朝詔上谷郡置五鑪許鑄錢又求兼河東遂拜雲中太守河東節度使既兼制三道意益侈男子凡十一帝以慶宗為太僕卿慶緒鴻臚卿慶長祕書監十載

按

宗紀祿山敗于契丹係天寶十載事原傳為十一載今改

率河東兵六萬討契丹以

奚兵二千為鄉導至土護真河祿山計曰道雖遠我疾
趨賊乘其不備破之固矣乃敕人持一繩欲盡縛契丹
晝夜行三百里次天門嶺會雨甚弓弩皆弛不可用祿山
督戰急大將何思德曰士方疲宜少息祿山怒欲斬之
乃請戰思德貌類祿山及戰契丹叢矛注矢邀取之傳
言祿山獲矣奚聞亦叛夾攻祿山士畧盡祿山中流矢
引奚兒數十棄衆夜走平盧部將史定方以兵鏖戰乃
解圍去十一載祿山忿前敗乃悉兵號二十萬討契丹

以報帝聞詔朔方節度使阿布思以師會阿布思者九
姓首領也偉貌多權略開元初為默啜所困內屬帝寵
之祿山忌其才不相下欲襲取之故表請自助阿布思
懼而叛轉入漠北祿山不進輒班師會阿布思為回紇
所掠奔葛邏祿祿山厚募其部落降之葛邏祿懼執阿
布思送北廷獻之京師祿山已得阿布思衆則兵雄天
下愈偃肆皇太子及宰相屢言祿山反帝不信是時國
忠疑隙已深建言追還朝以驗厥狀祿山揣得其謀乃

馳入謁帝意遂安凡國忠所陳無入者十三載來謁華
清宮對帝泣曰臣蕃人不識文字陛下擢以不次國忠
必欲殺臣以甘心帝慰解之拜尚書左僕射賜實封千
戶奴婢第產稱是詔還鎮又請為開廐隴右羣牧等使
表吉溫自副其軍中有功位將軍者五百人中郎將二
千人祿山之還帝御望春亭以餞斥御服賜之祿山驚
喜懼國忠奏留據通鑑
改輯疾驅出關至淇門輕轡循流而
下令挽夫十五里一更晝夜兼行日三百里既總閑牧

因擇良馬納范陽又奪張文儼馬牧反狀明白人告言者帝必縛與之明年國忠謀授祿山同中書門下平章事召還朝制未下帝使中官輔璆琳賜大柑因察非常祿山厚賂之還言無它帝遂不召然祿山亦懼朝廷圖已每使者至稱疾不出嚴衛然後見黜陟使裴士淹行部至范陽再旬始見無復臣禮士淹還不敢言帝賜慶宗娶宗室女手詔祿山觀禮辭疾甚獻馬三千匹執控夫倍之車三百乘乘三士因欲襲京師河南尹達奚珣

疑有變極請毋納帝始疑之詔如珣策冬十一月詭言
奉密詔討楊國忠騰榜郡縣以高尚嚴莊為謀主孫孝
哲高邈張通儒通晤為腹心發所部及同羅奚契丹室
韋兵凡十五萬號二十萬反於范陽先三日合大將置
酒觀繪圖起燕至洛山川險易攻守悉具人人賜金帛
并授圖約曰違者斬祿山從牙門部曲百餘騎次城北
祭先冢而行使賈循主留務呂知誨守平盧高秀巖守
大同下令有沮軍者夷三族凡七日反書聞帝方在華

清宮中外失色車駕還京師斬慶宗賜其妻康死榮義
郡主亦死下詔切責祿山許自歸祿山答書慢甚遣高
邀臧均以射生騎二十馳入太原劫取尹楊光翽殺之
以張獻誠守定州祿山謀逆十餘年凡降蕃夷皆接以
恩不服者以兵脅之祿山通夷語躬自慰撫皆釋俘囚
為戰士故其下樂輸死所戰無前時兵暴起官發鎧仗
皆穿朽鈍折禁衛多市井徒弗能抗敵吏皆棄城匿或
自殺或開門迎降不則擒戮乃發左藏庫繒帛大募兵

以封常清為范陽平盧節度使郭子儀為朔方節度關
內支度副大使右羽林大將軍王承業為太原尹衛尉
卿張介然為汴州刺史金吾將軍程千里為潞州長史
以榮王為元帥高仙芝副之馳驛討賊祿山以長繩維
舟集草木以結冰一昔合遂濟河陷靈昌郡至陳留張
介然死之郭納以城降遂陷滎陽次鬲子谷將軍荔非
守瑜邀之殺數百人流矢及祿山輿乃不敢前更出谷
南守瑜矢盡投河死敗封常清取東都常清奔陝殺留守

李愷御史中丞盧奕河南尹達奚珣臣于賊時高仙芝
屯陝關常清敗棄甲保潼關太守竇廷芝奔河東常山
太守顏果卿殺賊將李欽湊擒高邈何千年於是趙郡
鉅鹿廣平清河河間景城六郡皆為國守祿山所有纔
盧龍密雲漁陽汲鄴陳留滎陽陝郡臨汝而已賊之據
東京見宮闕尊雄銳情僭號故兵久不西而諸道兵得
稍集尹子奇屯陳留欲東略會濟南太守李隨單父尉
賈贛濮陽人尚衡東平太守嗣吳王祗真源令張巡相

繼起兵旬日衆數萬子奇至襄邑而還明年正月僭稱
雄武皇帝國號燕建元聖武子慶緒王晉慶和王鄭達
奚珣為左相張通儒為右相嚴莊為御史大夫署拜百
官復攻常山援絕城陷果卿被害安思義屯真定會李
光弼出土門救常山思義降博陵亦拔唯豪城九門二
縣為賊守史思明李立節蔡希德圍饒陽不克引軍攻
石邑張奉璋固守朔方節度使郭子儀自雲中引兵與
光弼合敗思明於九門城南渾瑊射李立節殺之希德

奔鉅鹿思明奔趙郡自鼓城襲博陵復據之光弼拔趙郡還圍博陵軍恒陽希德請濟師於賊賊以二萬騎涉滹沱入博陵牛廷珩發鳩檀等兵萬人來助思明益彊與光弼戰敗于嘉山光弼收郡十三河南諸郡皆嚴兵守潼關不開祿山懼欲還范陽召責嚴莊高尚田乾真解之乃遣孫孝哲安神威西攻長安會高仙芝等死哥舒翰守潼關為崔乾祐所敗帳下執送於賊關門不守帝遂幸蜀賊不謂天子能遽去注兵潼關十日乃西時

行在已至扶風於是汧隴以東皆沒於賊祿山以張通

儒守東京

舊書作西京留守

田乾真為京兆尹使安守忠屯苑

中祿山未至長安士人皆逃入山谷宮嬪散匿將相家

委寶貨不貲羣不逞爭取之累日不能盡又剽左藏大

盈庫百司帑藏竭乃火其餘祿山至怒乃大索三日民

間財貨盡掠之旬剝苛急百姓愈騷祿山怨慶宗死乃

取帝近屬自霍國長公主諸王妃妾子孫姻壻等百餘

人害之以祭慶宗羣臣從天子者誅滅其宗肆為殘虐

人益不附諸將欲咨決皆因嚴莊以見御下少恩雖腹
心雅故皆為仇敵郡縣相與殺守將迎官軍前後反覆
十數城邑墟矣肅宗治兵靈武長安相傳太子西來輒
東走關里至空都畿豪傑殺賊吏自歸者無虛日賊斬
刈懲之不能止又賊將類慄勇無遠謀日縱酒嗜聲色
財利車駕因得入蜀無追躡之患祿山既叛常志懼至
是目復盲俄又病疽益下躁左右給侍無罪輒死所信
聞人李猪兒及嚴莊皆遭笞辱故二人深怨祿山初慶

緒善騎射未冠為鴻臚卿賊僭號壁段夫人愛其子慶
恩欲立之慶緒懼不立莊亦疑難作不利已私語慶緒
曰君聞大義滅親乎自古固有不得已而為者慶緒曰
唯唯又語猪兒曰汝數得罪不行大事死無日遂與定
謀至德二載正月朔祿山朝羣臣創甚罷是夜莊慶緒
持刀扈門猪兒入帳下以大刀斫其腹祿山盲捫佩刀
不得振幄柱呼曰是家賊俄而腸潰遂死包以纊罽埋
牀下因傳疾甚矯稱偽詔傳位慶緒偽尊祿山太上皇

慶緒既襲偽位改元載初即縱樂飲酒委政於莊而兄事之以張通儒安守忠等屯長安史思明領范陽兼恒陽軍牛廷珣屯安陽張志忠戍井陘各募兵於是廣平王俶率師東討李嗣業將前軍郭子儀將中軍王思禮將後軍回紇葉護以兵從通儒等裒兵十萬陣長安中賊皆奚人素畏回紇既合驚且罵王分精兵與嗣業合擊之守忠等大敗引而東通儒棄妻子奔陝王收西京思禮清宮僕固懷恩以回紇南蠻大食兵前驅王悉師追

賊莊自將兵十萬與通儒合鉦鼓震百餘里尹子奇已
殺張巡悉衆十萬來并力營陝西次曲沃先是回紇傍
南山設伏按軍北崦以待莊大戰新店六遇輒北官軍
逐之入賊壘賊張兩翼攻之追兵敗沒官軍大亂嗣業
肉袒奮擊官軍復振回紇自南山繚擊其背賊驚遂亂
官軍夾攻之殺掠不勝算賊大敗追奔五十餘里莊奔
還與慶緒守忠通儒等劫殘軍走鄴郡王入洛陽大陳
兵天津橋偽侍中陳希烈等三百人素服叩頭待罪王

勞曰公等脅汙非反也天子有詔赦罪皆復而官衆大喜於是陳留殺賊將尹子奇以降嚴莊亦降肅宗引見釋其死授司農卿阿史那承慶以其衆三萬奔恒趙或趨范陽其從慶緒者瘡卒纔千餘會蔡希德自上黨田承嗣自潁川武令珣自南陽各以衆來又募兵河北衆至六萬賊復振以相州為成安府太守為尹改元天和按通鑑作改元天以高尚平洌為宰相崔乾祐孫孝哲成與此異謹識牛廷珣為將以阿史那承慶為獻城郡王安守忠左威

衛大將軍阿史那從禮左羽林大將軍然部黨益攜由是能元皓以偽淄青節度使高秀巖以河東節度使納款德州刺史王暕貝州刺史宇文寬皆背賊自歸河北諸軍各嬰城守賊使蔡希德安雄俊安太清等以兵攻陷之戮于市慶緒懼人之貳已設壇加載書拌血與羣臣盟然承慶等十餘人送密款自裨校等數數為國間賊而慶緒治宮室觀榭塘沼汎樓船為水嬉長夜飲通儒等爭權凡有建白衆共沮之希德兵最銳素得士通

儒以它事斬之麾下怨痛皆亡去慶緒以乾祐為天下
兵馬使權震中外懷悍少恩士不附乾元元年秋九月
帝詔郭子儀率九節度兵凡二十萬討慶緒攻衛州遂
渡河師背水壁而待慶緒拒戰子儀偽却慶緒逐之遇
伏而潰慶緒走獲其弟慶和斬於京師子儀引軍躡賊
戰愁思崗賊復敗自是銳兵盡矣因嬰鄴自固使薛嵩
以厚幣求救於史思明思明遣李歸仁將兵萬三千壁
滏陽未進而官軍圍已固築城濬隍三周決安陽水灌

城城中棧而處糧盡易口以食米斗錢七萬餘賊更以太清代乾祐將於是思明有衆十三萬三分其軍趨鄴明年三月營安陽慶緒急乃遣太清奉皇帝璽綬讓思明思明約慶緒為兄弟慶緒大悅官軍不利九節度奔還子儀斷河陽橋戍穀水思明進屯鄴南慶緒收官軍餘饌尚十餘萬石召孝哲等謀拒思明諸將皆曰不可思明請慶緒歃血盟不得已以五百騎詣思明軍思明先令軍中探甲以待慶緒至思明數之曰為人子殺父

求位非大逆邪吾乃為太上皇討賊顧左右牽出并其
四弟及高尚孫孝哲崔乾祐皆縊殺之思明改葬祿山
以王禮偽謚燕刺王祿山父子僭位凡三年而滅

高尚者雍奴人母老丐食自給尚客河朔不肯歸篤學
善文辭李齊物為新平太守薦諸朝贖錢三萬介之見
高力士力士以為才置門下家事一咨之諷近臣表其
能擢左領軍倉曹參軍力士語祿山表為平盧掌書記
因出入卧内祿山喜睡尚嘗執筆侍通宵不寢繇是親

受遂與嚴莊語圖識導祿山反陷東都偽拜中書侍郎
大抵賊所下赦令皆尚為之嚴莊降後尚獨與政事至
偽侍中

孫孝哲契丹部人母冶色祿山通之故孝哲得狎近長
七尺伉健有謀祿山對側門侯召衣帶絕不知所為孝
哲箴縷素具徐為紉綻祿山大悅天寶末官大將軍賊
僭位偽拜殿中監閑廐使爵為王性殘忍果於殺戮賊
令監張通儒等守長安殺妃王宗室子百餘人窮誅楊

國忠高力士黨與及與賊忤者不勝計剔首析肢流離道衢與嚴莊爭寵不平祿山死莊奪其使以與鄧季陽慶緒之奔莊懼為所圖因降

史思明寧夷州突厥種初名宰干玄宗賜其名姿癭露鵞肩偃背廠目側鼻寡鬚髮躁健譎狡與安祿山共鄉里生先祿山一日故長相善少事特進烏知義以輕騎覘賊多所擒馘通六蕃譯為互市郎負官錢亡走奚中為奚邏騎所困欲殺之紿曰我唐使人也若殺使者禍

且及汝請以我見王邇以為然送至王所不拜曰天子
使見小國君不拜禮也王怒然疑真使者卒授館待以
禮將還令百人從入朝奚有部將瑣高者名聞國中思
明欲擒以贖罪誅王曰從我者雖多無足與見天子惟
高材可與至中國王悅命高將帳下三百與俱既至平
盧遣謂戍主曰奚兵數百聲言入朝實欲為盜請備之
主潛師迎搗殺其衆執高送幽州節度使張守珪奇其
功表折衝與祿山俱為捉生天寶初累功至將軍知平

盧軍事入奏帝賜坐與語奇之遷大將軍北平太守從
祿山討契丹祿山敗單騎走師州殺其下左賢哥解魚
承仙自解思明逃山中再閱旬裒散卒得七百出見祿
山平盧祿山喜握手曰得汝吾何憂思明退語親密曰
向蚤出隨哥解地下矣契丹取師州祿山使思明擊走
之表平盧兵馬使祿山反使思明略定河北會賈循死
留思明守范陽而常山顏杲卿等傳檄拒賊祿山遣思
明攻常山九日執杲卿進薄饒陽盧全誠拒守河間景

城平原樂安清河博平六郡稍募兵自固河間李真以
兵七千救饒陽景城李暉持兵八千助河間平原顏真
卿以兵六千助清河悉為思明所敗暉子杞死之饒陽
被圍久不下會李光弼收常山思明遽解圍迎戰晝夜
行二百里相持不決郭子儀取趙郡合兵攻賊再戰皆
大敗之賊走博陵光弼圍博陵城幾拔屬潼關潰肅宗
召朔方河東兵光弼引還使王甫守常山賊尾追光弼
於井陘敗歸攻平盧劉正臣輕之不設備敗保北平兵

貲二千乘皆沒思明得其銳卒張甚謀攻常山備欲降諸將殺之遣使至信都迎刺史烏承恩鎮守不聽思明攻九門城中伏甲詭降賊登城伏起賊殲思明中戟扶以免復攻陷之引兵東圍橐城守將白嘉祐走趙郡思明圍之五日城陷嘉祐奔太原思明再陷常山賊別帥尹子奇圍河間顏真卿遣和琳將兵萬餘往救於是北風勁烈鼓聲不相聞賊縱擊大敗執琳引衆攻城擒李真又拔景城李暉赴河死招樂安降之遂攻平原未至

真卿以力不敵棄郡去進破清河執太守王懷忠入博平遂圍信都初賊先獲承恩母妻及子故承恩降而兵尚五萬騎三千賊并力圍饒陽援絕城陷太守李系自燔死思明兵所嚮縱其下椎剽淫奪人妻女以是士最奮祿山僞署范陽節度使始麾下騎纔二千同羅步曳落河止三千既數勝兵最彊信然有噬江漢心以精兵五萬畀尹子奇渡河劫北海以震淮徐會回紇襲范陽子奇乃還救遂不克至德二載與蔡希德高秀巖合兵

十萬攻太原光弼固守數月不能拔而安慶緒襲位賜
姓安名榮國爵媯川郡王賊之陷兩京禁府珍寶悉輸
范陽如丘阜思明見富彊憫然欲自取之已而慶緒敗
走相州殘士三萬北歸無所屬思明擊殺數千人降之

慶緒知其貳使阿史那承慶安守忠詣思明徵兵

按唐書作

使阿史那承慶李立節等語思明致通鑑及安祿山傳李立節已死于九門之敗今據舊書從刪

因密

圖之判官耿仁智欲以大誼動賊因說之曰方祿山彊
誰敢不服大夫事之固無罪今天子聰明勇智有少康

宣王風公誠發使輸誠無不納此轉禍入福之秋也思
明曰善承慶等未知以五千騎來思明悉衆介而逆之
前謂曰公等至士不勝喜然邊兵素憚使者威請弛弓
以入從之思明從承慶等飲即拘之收其甲仗郡兵給
貲遣之斬守忠以徇李光弼聞其絕慶緒使人招之思
明使其將竇子昂奉十三郡及兵八萬歸于朝於是高
秀巖以河東自歸有詔思明為歸義郡王范陽長史河
北節度使諸子並列卿以秀巖為雲中太守亦官其諸

子時烏承恩已歸國遣與中人李思敬尉撫趣討殘賊
思明乃遣張忠志守幽州假薛寧以恒州刺史招趙州
刺史陸濟使降授其子朝義兵五千守冀州假令狐彰
博州刺史戍滑州然思明外順命內實通賊益募兵帝
知之以其常事承恩父知義冀其無嫌即擢承恩為河
北節度副大使使圖思明承恩至范陽羸服夜過諸將
陰諭以謀諸將反以告思明明乃執承恩探衣囊得
賜阿史那承慶鐵券及光弼牒又得薄紙書數番皆當

誅將士姓名賊大詬曰我何負於爾而至是耶答曰此太尉光弼謀上不知也思明召官吏於廷西嚮哭曰臣赤心不負國何至殺臣因榜殺承恩父子及支黨二百餘人囚思敬以聞帝遣使諭曰事出承恩非朕與光弼意又聞三司議陳希烈等死思明懼諸將皆勸賊表天子誅光弼思明使耿仁智張不矜上疏請斬光弼不然且攻太原疏入于函仁智輒易去左右密白思明執二人曰若負我耶命斬之既又欲貸死仁智怒曰人固有

死大夫納邪說圖反我雖生不如死思明怒捶殺之九節度圍相州急慶緒間道求救思明懼官軍未敢進俄而蕭華舉魏州歸天子崔光遠代守思明乃引兵擊魏拔之殺數萬人乾元二年正月朔築壇僭稱大聖周王建元應天以周贄為司馬救相州却官軍殺慶緒并其衆欲遂西略虞根本未固即留朝義守相州自引還夏四月更國號大燕建元順天自稱應天皇帝妻辛為皇后以朝義為懷王周贄為相李歸仁為將號范陽為燕

京洛陽周京長安秦京更以州為郡鑄順天得一錢欲
郊及藉田聘儒生講制度留子朝清守幽州使阿史那
玉向貢張通儒高如震高久仁王東武等輔之兵四出
寇河南身出濮陽使令狐彰絕黎陽朝義出白高周萬
志自胡良渡河圍汴州於是節度使許叔冀濮州刺史
董秦梁浦田神功皆附賊賊勢益振乘勝鼓行西陷洛
陽破汝鄭滑三州圍李光弼河陽不能拔使安太清取
懷州以守光弼攻之太清降思明又遣田承嗣擊申光

等州王同芝擊陳許敬釭擊兗鄆薛粦擊曹上元二年

二月思明以計敗光弼兵於北邙官軍棄河陽懷州京

師震恐益兵屯陝州思明遂西使朝義為先鋒身自宜

陽繼進朝義攻陝敗于姜子坂

通鑑作
礪子嶺

退壁永寧思明

大怒召責朝義及駱悅蔡文景許季常欲誅之又敕朝

義築三角城居糧終日畢未塙而思明至怒不如約據

鞍畢塙乃去顧曰朝下陝夕斬是賊朝義憂懼不知所

為思明居傳舍令所愛曹將軍擊刁斗呵衛駱悅等被

讓即共說朝義曰悅與王死無日不如召曹將軍同計
大事朝義不應悅曰王誠不忍吾等且歸唐不得事王
矣朝義許之今季常以言動曹將軍曹將軍畏諸將不
敢拒思明愛優譚寢食常在側優者以其忍恨之是夜
思明如廁悅以兵入問所在共指廁思明知有亂踰垣
出至殿下將乘馬走悅麾下周子俊射其臂墜問難所
起曰懷王也思明曰旦日失言宜有此然殺我太早使
我不得至長安大呼懷王者三曰囚我可也無取殺父

名左右反接縛之送柳泉傳舍悅還報朝義時周贇許
叔冀以後軍屯福昌季常叔冀子也朝義令告之贇聞
驚仆地賊領兵還贇等出迎悅惡其貳乃殺贇次柳泉
悅畏衆不厭縊殺思明以殮裏尸橐駝負還東京朝義
乃即位建元顯聖陰令向貢阿史那王圖朝清朝清與
母辛俱死張通儒不知引兵戰城中數日亦死其黨自
相攻殺數月范陽乃定朝義以李懷仙為幽州節度使
朝義虛懷禮下事皆決大臣然無經略才當此時洛陽

諸郡人相食城邑榛墟又諸將皆祿山舊臣與思明故輩行恥為朝義屈召兵輒不至欲還幽州會雍王以河東朔方回紇兵十餘萬僕固懷恩與回紇左殺為先鋒魚朝恩郭英乂殿入自甌池李抱玉薄河陽李光弼徑陳留合兵討賊師次洛陽馳兵下懷州官軍部伍靜嚴賊有懼色朝義以師十萬距橫水官軍與戰大敗之俘馘六萬委牛馬器甲不可計朝義燒明堂東奔汴州偽節度張獻誠不納自濮北趣幽州朝義復敗至漳水無

舟諸將勸降朝義不聽遂走莫州僕固瑒追圍之閱四旬賊八戰八奔明年正月閱精兵欲決死田承嗣謂朝義不如身將驍銳還幽州令懷仙悉兵還戰臣請堅守朝義然納以騎五千夜犯圍出握承嗣手以家屬為託承嗣聽命朝義既去承嗣即以城降送朝義母及妻孺詣瑒壘於是諸軍率輕兵追之朝義至范陽懷仙部將李抱忠閉壁不受東走廣陽復不受謀奔兩蕃懷仙招之自漁陽回止幽州縊死醫巫閭祠下

按舊書作李懷仙生擒朝義送款來降衆

首闕下通鑑作懷仙遣兵追及之朝懷仙斬其首傳長
義窮蹙繼于林中並與本傳互異

安召故將收其屍懷仙改服出次哭之偽恒州刺史張
忠志趙州刺史盧俶定州刺史程元勝徐州刺史劉如
伶相州節度使薛嵩及懷仙承嗣等皆舉其地以歸思
明父子僭號凡四年而滅

欽定續通志卷六百二十七

欽定四庫全書

欽定續通志卷六百二十八

逆臣傳

唐二

李希烈

朱泚

源休
田希鑒

姚令言

李希烈燕州遼西人少籍平盧軍從李忠臣浮海戰河北有勞及忠臣在淮西因署偏裨試光祿卿軍中稱其才大歷十四年忠臣荒縱不事希烈因衆怒逐之詔以

希烈為蔡州刺史淮西留後又詔滑亳節度使李勉兼
領汴州德宗立加御史大夫即拜節度使名淮西軍曰
淮寧以寵之梁崇義之反敕諸道進討詔進希烈南平
郡王漢南北招討處置使又拜諸軍都統平崇義功多
擁兵欲有其地會山南節度使李承至希烈乃大掠而
去以功檢校尚書右僕射同中書門下平章事李納叛
以檢校司空兼淄青節度使討之希烈擁衆三萬次許
州不進遣李荳約納為唇齒陰計取汴州納遣游兵導

希烈絕汴餉路希烈遣使者約河北朱滔田悅王武俊等連和凶焰熾然俄而滔等自相王遣使者來奉牋希烈亦自號建興王天下都元帥五賊株連半天下建中四年正月賊陷汝州執李元平兵四出抄掠東都大震帝聽盧杞計詔太子太師顏真卿諭賊已行又遣左龍武大將軍哥舒曜討之希烈見真卿傲桀不臣敕左右訾侮朝政即北侵汴州南略鄂州有詔江西節度使嗣曹王皋擊之拔斬黃兩州擊賊將李良韓霜露於白巖

二將走希烈遣周曾呂從賁康琳拒曜次襄城與王玢
姚愔韋清合謀襲希烈不克皆死清奔劉洽希烈懼還
蔡州上疏歸罪曾等帝不赦遣神策將劉德信將節度
觀察團練子弟兵屯陽翟并力以李勉為淮西招討使
曜副之荆南節度使張伯儀為淮西應援招討使山南
節度使賈耽與臯副之德信去陽翟壁汝賊取陽翟覆
伯儀軍曜戰不利屯襄城希烈舉衆三萬圍曜城陷曜
奔東都賊進陷汴州勉奔宋州希烈已據汴僭即皇帝

位國號楚建元武成以張鷟子李綬李元平為宰相鄭
賁為侍中孫廣為中書令披其地建四節度以汴州為
大梁府因窺江淮盛兵攻襄邑守將高翼死之於是汴
滑副都統劉洽率曲環李克信軍十餘萬戰白塔不利
洽引還夜入宋州賊驟勝徑薄寧陵舟乘衝墮進亘七
十里時洽將高彥昭劉昌共嬰壘以守彥昭擊家牛犒
軍士死戰斬首三千級請援於洽洽選兵八百夜艾而入
賊不知詰旦傳城士奮出希烈大敗斬首萬計追北至

襄邑收賊貨糧而還希烈既沮却還汴州遣崇暉以精兵襲陳復為洽敗俘衆三萬執翟崇暉進拔汴州禽鄭賁劉敬宗張伯元呂子巖李達千希烈遁歸蔡賊戍將孫液挈鄭州降帝即拜液為刺史貞元二年遣杜文朝寇襄州為樊澤所破獲文朝會李臯張建封曲環及李澄四略其地勢日蹙希烈縮氣不敢搖啖牛肉而病親將陳仙奇陰令醫毒之以死始希烈入汴聞戶曹參軍竇良女美彊取之女顧其父曰慎無戚我能滅賊後有

龍嘗稱仙奇忠勇可用而妻亦實姓願如如媚者以固其夫希烈許諾乘間往謂仙奇妻曰賊雖彊終必敗奈何實久而寤及希烈死子不發喪欲悉誅諸將乃自立未決有獻含桃者實請分遺仙奇妻聽之因蠟帛九雜果中出所謀仙奇大驚與薛育率兵譟而入斬希烈子函希烈并妻子七首以獻尸希烈於市帝以仙奇忠即拜淮西節度使百姓給復二年俄為吳少誠所殺詔贈太子太保實亦死

朱泚幽州昌平人父懷珪事安史二賊偽署柳城使

朱泚

書懷珪為柳城使乃李懷仙歸順使所奏非安史時事與此互異

泚壯偉腰腹十圍外

寬和中實狠刻少以父蔭籍軍中與弟滔並為李懷仙部將凡戰所得必分麾下以結士心故得濟其兇謀朱希彩既殺李懷仙自為節度使頗委信之大歷七年希彩為下所殺衆未有屬泚方屯城北而滔主牙兵尤狡譎乃潛使數十人大呼軍門曰帥非朱公莫可衆愕眙因共詣泚推知留後遣使至京師聽命有詔檢校左散

騎常侍即拜盧龍節度留後俄遷節度使封懷寧郡王
實封戶二百泚上書謝遣泚將兵赴京西防秋代宗悅
手詔褒美居三年求入朝自幽州首亂懷仙以來雖外
臣順然不朝謁而泚倡諸鎮以騎三千入覲詔起甲第
待之既至見內殿賜乘輿馬二戰馬十金綵甚厚士校
皆有賜宴賚隆渥泚之來滔攝後務稍稍翦落泚牙角
泚自知失權乃請留京師帝因授滔節度留後及令泚
與郭子儀李抱玉馬璘分統防秋兵而泚主汴宋淄青

進同中書門下平章事出屯奉天遷檢校司空代李抱
玉為隴右節度副大使仍知河西澤潞行營兵馬事明
年徙王遂寧德宗立改鎮鳳翔進封三百戶建中初以
李懷光代段秀實兼節度涇原徙屯原州懷光前督作
泚與崔寧領兵繼進涇士素聞懷光暴皆懼劉文喜因
劫衆以亂請留秀實又求屬泚詔泚代懷光文喜合兵
二萬乘城詔泚懷光攻之文喜閉壁求救於吐蕃吐
蕃方睦於唐不為發兵

原作吐蕃與師衆通鑑注
是時吐蕃無入援文喜事

考証甚明
今據改正

文喜將劉海賓與其徒殺文喜入泚軍泚一
無所戮由是涇人德之詔加中書令還屯進拜大尉
合田悅叛陰遣人與泚相聞河東馬燧獲其書帝召泚
示之泚惶懼請死帝勉曰千里不同謀卿何謝更以張
鎰節度鳳翔留泚京師加實封千戶不朝請以中人監
其第李希烈圍哥舒曜於襄城詔涇原節度使姚令言
督鎮兵五千救之師次澧水京兆尹王翊使吏供軍糲
飯菜肴衆怒盡擐甲張旗鼓譟趨京城時令言入辭尚

在禁中聞變馳至長樂坂遇亂兵劫以西行帝再遣使
開諭賊已薄丹鳳門詔集六軍無至者乘輿倉卒出幸
奉天令言與亂兵謀曰今衆無屬不能持久朱太尉方
囚錮若迎之事可濟乃遣百餘騎見泚泚偽讓不答留
使者飲以觀衆心夜數百騎復往泚知不偽乃擁徒向
闕下列炬傳呼入宮居含元殿自稱權知六軍明日徙
居白華殿或說泚迎天子泚顧望愕然光祿卿源休至
請問教以不臣詭稱符命泚悅張光晟李忠臣皆新失

職怨望亦勸成之鳳翔大將張廷芝涇原將段誠諫引
潰兵三千自襄城來泚自謂得人助逆志遂決因署休
京兆尹判度支忠臣皇城使又以段秀實失軍疑有怨
起之委以謀秀實與劉海賓憤發秀實以笏擊賊破面
忠臣護泚得脫走秀實遂遇害泚僭即皇帝位於宣政
殿號大秦建元應天侍衛皆卒伍諸臣在位者纔十餘
遍太常卿樊系為冊文

舊書作偽署樊系為禮部侍郎

冊成仰藥死拜

令言侍中闕內副元帥忠臣司空兼侍中休中書侍郎

蔣鎮門下侍郎並同中書門下平章以蔣鍊為御史中丞敬缸御史大夫許季常京兆尹洪經綸太常少卿彭偃中書舍人裴揆崔幼真給事中廷芝光晟誠諫崔宣張寶何望之杜如江等並偽署節度使以兄子遂為太子以湣為冀王太尉尚書令號皇太弟帝使高重傑屯梁山禦賊賊將李日月殺之日月銳甚自謂無前乃燒陵廟鹵御物帝患之渾瑊伏兵漠谷引數千騎跳攻長安瑊引卻日月尾追遇伏射日月殺之泚自將逼奉天

以令言為上將光晟副之忠臣留守以蔣鍊李子平為
宰相於是城率韓游瓌禦泚泚大敗死者萬計退三里
而舍修攻具毀廬室為樓車百尺下峴城中會杜希全
以兵敗漢谷賊益張急攻城驅民填塹造雲梁令壯士
居上將傅堞守者震駭渾瑊乃使侯仲莊韓澄穴地道
梁陷縱火焚之衆亂而罵城中兵出皇太子督戰賊大
敗然賊負其衆圍城益急凡三旬有六日而李懷光以
兵五萬至敗賊于魯店遂戰城下自辰至昏賊潰是夜

汎引去興元元年汎以本封遂寧漢地也更號漢改元
天皇奉天所下赦令凡受賊偽官者破賊日悉貸不問
官軍密榜諸道汎方宿未央涇原士謀殺汎汎知之輒
徙它處衆謀亦止官軍壞龍首香積二塢以決其流城
中水絕汎役數百人治之東出灊水與官軍戰大奔還
闔都門士皆甲以待久乃罷李子平請修攻具襲懷光
取苑中六街大木為衝車人不堪苦又禁居人夜行三
人以上不得聚飲食上下惴恐賊所用唯盧龍神策團

練兵而涇原軍驕不可制但完守所獲不出戰故泚數
北憂甚欲出走會李懷光貳于帝不欲泚平按軍觀望
帝欲幸咸陽趣諸將捕賊懷光出醜言乃詔戴休顏守
奉天尚可孤守灊上駱元光守渭橋進狩梁州懷光遂
與泚連和京師知帝益西二叛膠固謂亂且成出受賊
官者十八始泚多出金兄事懷光約平關中割地為鄰
國故懷光決反因并陽惠元李建徽軍泚既知懷光反
即賜詔待以臣禮督其兵入衛懷光慙見欺引軍東保

河中泚誘涇原將田希鑒希鑒殺馮河清降賊泚即使
代河清為節度李晟等兵寢彊士益附而琿瑊又擊破
賊將韓旻來歸朝於武亭川斬計萬級晟率琿瑊駱元
光尚可孤悉師攻賊晟薄光泰門敗賊將張廷芝李希
倩賊棄門哭保白華晟引軍還居三日復戰大敗之乃
分道入泚將段誠伏莽中為王伉所禽姚令言張廷芝
與晟遇十關皆北遂至白華始張光晟以精兵壁九曲
距東渭橋十里密約降於晟晟之入光晟勸泚等出奔

故泚挾令言廷芝休子平朱遂引殘軍西走光晟衛出
之因詣晟降泚奔涇州田希鑒拒之泚更舍逆旅遣梁
廷芬入見希鑒曰公殺一節度唐天子必不容何不納
朱公成大事希鑒陰可廷芬出報泚悅廷芬請宰相不
得乃不復入泚猶餘范陽卒三千北走驛馬關寧州刺
史夏侯英開門陣而待泚不敢入因保彭原西城廷芬
與泚腹心朱惟孝夜射泚墜窖中韓旻薛綸高幽岳武
震朱進卿董希芝共斬泚使宋膺傳首以獻涇卒殺令

言降希鑒源休李子平走鳳翔李楚琳斬之傳首行在
泚壻金吾將軍馬悅走党項得入幽州李希倩等皆以
次夷滅源休相州人初為京兆尹使回紇還次太原盧
杞畏其辯能結主恩奏為光祿卿休怨望故導泚僭
號為調兵食署拜百官事皆咨之時論其逆甚於泚脅
辱大臣多殺宗室子孫幾于盡每官軍不利喜見眉宇
與姚令言勸泚圍奉天晝夜為賊謀二人爭自比蕭曹
休即收圖籍貯府庫以效何令言者河中人始應募諫

涇原節度使馬璘府孟皞為留後表其謹肅任將帥皞
歸朝令言遂為節度使既挾泚亂頗盡力彭偃銳于進
自謂為宰相所抑鬱鬱不懌泚亂匿田家既得用辭令
一出其手故辭尤諄慢李晟愛張光晟才表丐原死置
軍中駱元光怒曰吾不能與反虜同坐拂衣去晟乃殺
之晟惡田希鑒之逆欲因事誅之會吐蕃寇涇州晟行
邊希鑒來謁晟置酒召諸將希鑒等詣營晟責以殺節
度使受賊節罪縊之幕中以李觀代為節度使

欽定續通志卷六百二十八

欽定四庫全書

欽定續通志卷六百二十九

逆臣傳

唐三

黃巢

王仙芝

秦宗權

董昌

黃巢曹州冤句人少與王仙芝以販私鹽為事

據通鑑
改輯

善擊劍騎射稍通書牘給喜養亡命咸通末歲荐饑盜

興河南乾符二年仙芝聚眾三千殘曹濮二州眾至數

萬勢遂張妄號大將軍其黨尚君長柴存畢師鐸曹師
雄柳彥璋劉漢宏李重霸等十餘輩所在肆掠而巢屢
舉進士不第遂為盜聚衆數千人以應仙芝轉寇河南
十五州帝使平盧節度使宋威為諸道行營招討使詔
河南諸鎮皆受節度以左散騎常侍曾元裕副焉威擊
仙芝於沂州城下破之仙芝亡去威因奏大渠死擅縱
麾下兵還青州羣臣皆入賀居三日州縣奏賊故在時
兵始休有詔復遣士皆忿思亂賊聞之趣郟城不十日

破八縣帝憂迫近東都督諸道兵檢過於是鳳翔邠寧
涇原兵守陝州潼關元裕守東都義成昭義以兵衛宮
仙芝去攻汝州殺其將刺史走東都大震百官脫身出
奔賊破陽武圍鄭州不克塏聚鄧汝間關以東州縣大
抵皆畏賊嬰城守故賊放兵四略殘郢復二州所過焚
剽生人幾盡官軍急追則遺貨布路士爭取之率逗撓
不前賊轉入申光殘隋州執刺史據安州分奇兵圍舒
擊廬壽光等州時威老且闇陰與元裕謀養賊以自固

帝知之更以陳許節度使崔安潛為行營都統以前鴻臚卿李琢代威右威衛上將軍張自勉代元裕賊出入蘄黃蘄州刺史裴渥為賊求官約罷兵仙芝與巢等詣渥飲未幾詔拜仙芝左神策軍押衙遣中人慰撫仙芝喜巢恨賞不及已大怒曰君獨得官五千衆且安歸因擊仙芝傷首仙芝憚衆怒即不受命渥中人亡去賊分其衆尚君長入陳蔡巢北掠齊魯入鄆州殺節度使薛崇進陷沂州遂至數萬繇潁蔡保嶺岢山引兵復與仙

芝合圍來州會自勉救兵至斬賊二千級仙芝解而南
度漢攻荆南於是節度使楊知溫嬰城守賊縱火焚樓
堞知溫不出有詔以高駢代之駢以蜀兵至而城已陷
巢攻和州未克仙芝自圍洪州取之進破朗岳遂圍潭
州觀察使崔瑾拒却之乃向浙西擾宣潤不能得所欲
身留江西趣別部還入河南帝詔崔安潛歸忠武復起
宋威曾元裕為招討使而楊復光監軍復光遣其屬吳
彥宏以詔諭賊仙芝乃遣蔡溫球楚彥威尚君長來降

欲詣闕請罪又遺威書求節度使陽許之上言與君長
戰禽之復光固言其降命侍御史與中人馳驛即訊不
能明卒斬君長等於狗脊嶺仙芝怒還攻洪州入其郭

威自將往救

按舊書作宋威為賊所敗朝廷以王鐸代
為招討收復亳州斬仙芝通鑑從實錄作

曾元裕斬仙芝
並與新書王興

敗仙芝於黃梅斬賊五萬級獲仙芝傳

首京師當此時巢方圍亳州未下君長弟讓率仙芝潰
黨歸巢推巢為王號衝天大將軍署拜官屬驅河南山
南之民十餘萬掠淮南建元王霸曾元裕敗賊於申州

死者萬人帝以威殺尚君長非是且討賊無功詔還青
州以元裕為招討使張自勉為副巢破考城取濮州元
裕軍荆襄援兵阻更拜自勉東北面行營招討使督諸
軍急捕巢方掠襄邑雍丘詔滑州節度使李嶧壁原武
巢寇葉陽翟欲窺東都會左神武大將軍劉景仁以兵
五千援東都河陽節度使鄭延休兵三千壁河陰巢兵
在江西者為鎮海節度使高駢所破寇新鄭郊襄城陽
翟者為崔安潛逐走在浙西者為節度使裴瓌斬逐巢

大沮畏乃詣天平軍乞降詔授巢右衛將軍巢度藩鎮
不一未足制已即叛去轉寇浙東執觀察使崔瑋於是
高駢遣將張潁梁繼攻賊破之賊收衆踰江西破虔吉
饒信等州因刊山開道七百里直趨建州福州觀察使
韋岫戰不勝棄城遁賊入之閩地諸州皆沒有詔高駢
為諸道行營都統以拒賊巢陷桂管進寇廣州詔節度
使李迢書求表為天平節度又脅崔瑋言於朝宰相鄭
畋欲許之盧攜田令孜執不可巢又丐安南都護廣州

節度使書聞右僕射于琮議南海市舶利不貲賊得益

富而國用屈乃拜巢率府率巢見詔大詬急攻廣州執

李迢殺之

按通鑑黃巢殺李迢在破江陵前新書誤載于後今改

自號義軍都統

露表告將入闕僖宗既罷宋威而宰相王鐸請自行乃

拜鐸荆南節度使南面行營招討都統率諸道兵進討

鐸屯江陵表泰寧節度使李係為招討副使兼湖南觀

察使以先鋒屯潭州兩屯烽驛相望會賊中大疫衆死

什四遂引北還自桂編大桴沿湘下衡永破潭州李係

走朗州兵十餘萬殲焉進逼江陵號五十萬鐸兵寡棄

城走襄陽留劉漢宏守江陵鐸去漢宏乘亂縱掠

按通鑑王

鐸已去漢宏始大掠江陵新舊作鐸未去時事全改正

會雨雪人多死溝壑賊欲

進躡鐸會江西招討使曹全晟與山南東道節度使劉

巨容壁荆門使沙陀以五百騎逆戰佯不勝而走賊以

為怯急追之伏發大敗執賊渠十二輩巢懼度江東走

師促之俘什七八或勸巨容窮追答曰國家多負人危

難不吝賞事平則得罪不如留賊冀後福止不追故巢

得復整臨鄂州全晟將度江會有詔以段彥蕃代其使
乃止巢畏襲轉掠江西再入饒信杭州衆至二十萬攻
臨安戍將董昌兵寡不敢戰伏數十騎莽中賊至伏弩
射殺賊將賊還殘宣歙等十五州廣明元年淮南高駢
遣將張潏度江敗王重霸降之巢數卻乃保饒州衆多
疫別部常宏以衆數萬降潏急擊之巢以金啗潏且致
書請降於駢駢恐諸將分功乃奏賊不日當平請遣諸
道兵巢訶知遂請戰

按原傳作諸軍屢奏破賊朝廷信之巢得計破殺張潏今據通鑑改

破殺張潁臨睦娶二州又取宣州而漢宏殘衆復奮寇
宋州掠申光來與巢合濟采石侵揚州高駢按兵不出
詔充海節度使齊克讓屯汝州拜全晟天平節度使兼
東面副都統賊方守滌和全晟以天平兵敗於淮上巢
悉衆度淮妄稱率土大將軍整衆不剽掠所過惟取丁
壯益兵李罕之犯申光潁宋徐兗等州吏皆亡巢自將
攻汝州欲薄東都宰相共建言悉神策并闕內諸節度
兵十五萬守潼關田令孜請自將而東於是擢左軍騎

將張承範為先鋒右軍步將王師會督糧道以飛龍使
楊復恭副令招募兵京師纔得數千人而巢已陷東都
留守劉允章以百官迎降賊復取陝虢進攻潼關齊克
讓以其軍戰關外賊少卻俄而巢至師大噤川谷皆震
士饑甚燒營而潰克讓走入關承範出金諭軍中曰諸
君勉報國救且至士感泣拒戰賊見師不繼急攻關官
軍矢盡飛石以射始關左有大谷尚讓引衆趨谷承範
惶遽使師會以勁弩八百邀之比至而賊已入明日夾攻

關官軍潰師會欲自殺承範止之乃羸服逃見帝具言
不守狀帝默宰相盧攜方朝而傳言賊至百官奔令孜

以神策兵五百奉帝趨咸陽惟福穆潭壽四王

通鑑作福穆潭

壽四王與妃御一二從中人西門匡範統右軍以殿巢以

尚讓為平唐大將軍蓋洪費全古副之金吾大將軍張

直方與羣臣迎賊灞上巢乘黃金輿衛者皆繡袍華幘

其黨乘銅輿以從騎士凡數十萬先後之臨京師入自

春明門升太極殿宮女數千迎拜稱黃王巢舍田令孜

第賊見窮民抵金帛與之甫數日因大掠縛箠居人賊
酋閱甲第以處亂人妻女捕得官吏悉斬之火廬舍不
可計殺宗室侯王無遺類巢齋太清宮卜日舍舍元殿
僭即位號大齊繪弋綈為袞衣擊戰鼓以代金石之樂
列長劍大刀為衛大赦建元為金統唐官三品以上停
四品以下還之因自陳符命取廣明字判其文曰唐去
丑口而著黃明黃當代唐又黃為土金所生蓋天啟云
其徒上巢號承天廣運啟聖睿文宣武皇帝以妻曹為

皇后以尚讓趙璋崔瑯楊希古為宰相鄭漢璋御史中丞李儋黃諤尚儒為尚書方特諫議大夫皮日休沈雲翔裴渥翰林學士孟楷蓋洪尚書左右僕射兼軍容使費傳古樞密使張直方檢校左僕射馬祥右散騎常侍王璠京兆尹許建來實劉瑋朱溫張全

按米實舊書作朱實張全舊書

作張言並互異

彭攢季達等為諸將軍游奕使其餘以次封拜

取趨偉五百人號功臣下令軍中禁妄殺人悉輸兵於官然其下本盜賊皆不從召唐時舊官無至者乃大索

里間亘盧瑑崔沆等匿永寧里張直方家直方者素豪傑故士多依之或告直方納亡命者巢攻之夷其家瑑沆及大臣劉鄩裴諗趙濛李溥李湯死者百餘人將作監鄭綦郎官鄭係舉族縊是時乘輿次興元詔促諸道兵收京師遂至成都巢使朱溫攻鄧州臨之以擾荆襄遣林言尚讓寇鳳翔為鄭畋將宋文通所破不得前畋乃傳檄召天下兵於是詔涇原節度使程宗楚為諸軍行營副都統前朔方節度使唐弘夫為行營司馬數攻

賊斬萬級邠將朱玫陽為賊將王玫裒兵俄而殺王玫
引兵入於官軍弘夫進屯渭北河中王重榮營沙苑易
定王處存次渭橋邠延李孝昌夏州拓拔思恭壁武功
弘夫拔咸陽破尚讓軍乘勝入京師巢竊出至石井宗
楚入自延秋門處存遣銳卒五千以白帟自誌夜入殺
賊都人傳言巢已走邠涇軍爭入京師諸軍亦解甲休
競掠貨財子女巢伏野使覘城中弛備則遣孟楷率賊
數百掩邠涇軍都人猶謂官軍謹迎之軍士重負不能

走是以甚敗賊執弘夫害之處存走始王璠破奉天引
衆數千隨弘夫及諸將敗獨一軍戰尤力巢復入京師
怒民迎官軍縱擊殺八萬人血流於路可涉也謂之洗
城諸軍退保武功於是中和元年四月也

按通鑑中和元年改元在

七月而程宗楚等入長安殺賊並在是其五月昭義高

年四月原傳作中和二年二月今據改

潁攻華州王重榮與并力克之朱玫以涇岐麟夏兵八
萬營興平巢亦遣王璠營黑水玫戰未能勝鄭畋將竇
玫夜率士燔都門殺邏卒賊震懼於時畿民柵山谷自

保不得耕斗米錢三十千屑樹皮以食士人或賣餅自
業舉奔河中李孝昌拓拔思恭徙壁東渭橋賊帥朱溫
尚讓涉渭敗孝昌等軍高潁擊賊李詳不勝賊復取華
州巢即授詳華州刺史以溫為同州刺史賊又襲孝昌
二軍引去賊破陳敬瑄兵走南山齊克儉營興平為賊
所圍決河灌之不克二年僖宗更以王鐸為諸道行營
都統崔安潛副之周岌王重榮為左右司馬諸葛爽康
寶為左右先鋒平師儒為後軍時溥督漕賦王處存李

孝章拓拔思恭為京畿都統處存直左孝章在北思恭
直右西門思恭為都監楊復光監行營中書舍人盧胤
征為克復制置副使於是鐸以山南劔南軍營靈感祠
朱玫以岐夏軍營興平重榮處存營渭北復光以壽滄
荆南軍合岌營武功孝章合拓拔思恭營渭橋程宗楚
營京右朱溫以兵三千掠丹延南鄙趨同州刺史米逢
通鑑作
米誠 出奔溫據州以守六月尚讓寇河中使朱溫攻
四關敗諸葛爽破重榮數千騎於河上爽閉關不出讓

遂拔邵陽七月攻宜君寨大雨雪盈尺賊死什二三賊
攻鳳翔敗節度李昌言於潯水又遣彊武攻武功槐里
涇邠兵卻獨鳳翔兵固壁拓拔思恭以銳士萬八千赴
難逗留不進河中糧艘三十道夏陽朱溫使兵奪艘重
榮以甲士三萬救之溫懼鑿沈其舟兵遂圍溫溫數困
又度巢勢蹙且敗而孟楷方專寵溫乞師楷沮不報即
斬賊大將馬恭降重榮帝進拓拔思恭為京四面都統
敕朱玫軍馬寃溫既降重榮遇之厚故李詳亦獻款賊

覺斬之更以黃思鄴為刺史華卒逐黃思鄴推王遇為主遇降於重榮明年正月王鐸使鴈門節度使李克用破賊于渭南承制拜東北行營都統會鐸與安潛皆罷克用獨引軍自嵐石出夏陽屯沙苑破黃揆軍營乾阬二月合河中易定忠武等兵擊巢巢命王播林言軍居左趙璋尚讓軍居右衆凡十萬與官軍大戰梁田陂賊敗執俘數萬僵尸三十里斂為京觀播與黃揆襲華州據之遇亡去克用掘塹環州分騎屯渭北命薛志勤康

若立

舊書作君立

夜襲京師火庵聚俘賊而還巢戰數不利

軍食竭下不用命陰有遁謀即發兵三萬搤藍田道使尚讓援華州克用重榮迎戰零口破之遂拔其城揆引衆走四月克用遣步將楊守宗率河中將白志遷忠武將龐從等先進擊賊渭橋三戰皆捷於是諸節度兵繼至賊衆大奔克用入自光泰門身決戰呼聲動天賊潰逐北至望春入昇陽殿巢夜走衆猶十五萬出藍田入商山委輜重珍貨於道諸軍爭取之不復追故賊得整

軍去楊復光獻捷行在帝詔陳許延州鳳翔博野軍合
東西神策二萬人屯京師命大明宮留守王徽衛諸門
撫定居人詔尚書右僕射裴璩修復宮省購輦輅仗衛
舊章祕籍豫敗巢者神策將橫街軍使楊守亮躡雲都
將高周彝忠順都將胡真天德將顧彥朗七十人巢已
東使孟楷攻蔡州節度使秦宗權迎戰大敗即臣賊與
連和楷移兵擊陳州刺史趙犍擊斬之巢自圍陳縱兵
略鄧許孟洛東入徐充數十州時大饑賊俘人以食朱

全忠為宣武節度使與周岌時溥帥師救陳趙犇亦乞
兵太原巢遣宗權攻許州未克於是糧竭木皮草根皆
盡四年二月李克用率山西兵由陝濟河而東會關東
諸鎮壁汝州全忠擊賊瓦子寨斬萬餘級諸軍破尚讓
於太康亦萬級獲械鎧馬羊萬計又敗黃思鄴於西華
思鄴夜遁巢大恐退營故陽里五月大雨震電川谿皆
暴溢賊壘盡壞衆潰始解圍而去全忠進戍尉氏克用
追巢全忠還汴州巢取尉氏攻中年兵半度克用擊之

賊多溺死巢引殘衆走封丘克用追敗之還營鄭州巢

度河攻汴全忠拒守克用救之斬賊驍將李周楊景彪

等

舊書作李用楊景

巢夜走柞城入寃句克用悉軍窮蹙賊將

李謙楊能霍存

舊書作楊霍

葛從周張歸霸張歸厚往降全

忠而尚讓以萬人歸時溥巢愈猜忿屢殺大將引衆奔

兗州克用追至曹獲男女牛馬萬餘及乘輿器服禽巢

愛子克用軍晝夜馳糧盡乃還巢衆僅千人走保泰山

六月時溥遣將陳景瑜與尚讓追戰狼虎谷巢計蹙謂

其甥林言曰取吾首獻天子可得富貴毋為佗人利言
不忍巢乃自刎不殊言因斬之及兄存弟鄴揆欽秉萬
通思厚并殺其妻子悉函首將詣溥而太原博野軍殺
言與巢首俱上溥獻於行在詔以首獻於廟巢從子浩
衆七千為盜江湖間自號浪蕩軍天復初欲據湖南陷
瀏陽殺略甚衆湘陰彊家鄧進思率壯士伏山中擊殺
之

秦宗權蔡州上蔡人

舊書作
許州人

為許牙將巢涉淮節度使

薛能遣宗權調兵淮西而許軍亂殺能宗權外示赴難
因逐蔡州刺史據其城周岌代能領節度即授以蔡州
有兵萬人乃遣將從諸軍敗賊於汝州楊復光言之朝
擢防禦使寵其軍曰奉國即為本軍節度使進檢校司
空巢走出闕宗權迎戰不利遂與連和圍陳州擾敎梁
宋間巢死宗權復熾分兵四掠遣弟宗言寇荆南秦誥
出山南陷襄州進破東都圍陝州使秦彥

通鑑作
陳彥

寇淮

肥秦賢略江南宗衡亂岳鄂所至屠滅自闕中薄青齊

南繚荆郢北亘衛滑千里無舍煙惟趙犂保陳朱全忠
保汴僅自完而已然宗權無霸王計惟亂是恃兵出未
始轉糧車載鹽尸以從僖宗假朱全忠都統節以討賊
秦賢略宋及曹全忠好書約和賢遣張調請分地自汴
以南歸之蔡全忠陰許而賢引兵濟汴肆燔劫全忠大
怒斬調進與賊戰殺獲甚衆宗權急攻許節度使鹿晏
弘乞師於全忠師未及出已破晏弘進取鄭州擊河橋
遂守河陽放兵侵汴西鄙北鄙全忠壁酸棗戰不克宗

權屯邊村使秦賢營雙丘侵板橋盧瑋引兵進屯萬勝
夾汴而柵全忠擊殺瑋宗權悉軍十五萬列三十六屯
逼汴全忠懼求救於兗鄆而朱瑾朱宣皆身自將同拒
賊全忠閉城大會鼓聞于郊陰啟北門擊賊壘士譁趨
中營兗鄆整兵合擊大敗之宗權忿過鄭焚邠舍驅民
入淮西全忠遂有鄭許河陽東都於是合諸鎮兵會上
蔡分為五軍拔其壁遂圍蔡州傅城壘以羸兵誘賊出
戰全忠盡斬之宗權退守中州未能下全忠使大將胡

元琮圖之身還汴宗權間許無備襲取其州執元琮引兵復收許宗權還為愛將申叢所囚折一足以待命全忠署叢節度使留後叢中悔蔡將郭璠殺申叢送宗權至汴據通鑑增輯全忠以檻車送京師與妻趙俱斬獨柳下宗權以中和三年叛六年而誅

董昌杭州臨安人始籍土團軍以功擢石鏡鎮將中和元年按通鑑董昌拒路審中自領州事事在中和元年新書原作三年今改刺史路審中

之官昌率兵拒之不得入即自領州事鎮海節度使周

寶不能制因表為刺史昌已破劉漢宏兵益彊進義勝
軍節度使檢校尚書右僕射僖宗始還京師昌取越民
裴氏藏書獻之補祕書之亡授兼諸道採訪圖籍使為
治廉平人頗安之當是時天下貢輸不入獨昌賦外獻
常參倍朝廷賴其入故累拜檢校太尉同中書門下平
章事爵隴西郡王而小人意足寢自侈大託神以詭衆
立生祠刻香木為軀內金玉紈素為肺府冕而坐妻媵
侍別帳百倡鼓吹於前屬兵列護門阨屬州為土馬獻

祠下列牲牢祈請昌自言有饗者我必醉寢用峭法笞
至千百或小過輒夷族凡民訟不視獄但與擲博齒不
勝者死用人亦取勝者昌得郡王咤曰朝廷負我吾奉
金帛不貲何惜越王不吾與吾當自取之下厭其虐乃
勸為帝近縣舉狂譟請昌令曰時至我當應天順人
其屬吳繇秦昌裕盧勤朱璣董庠李暢薛遼與妖人應
智王溫巫韓媼皆贊之吏民爭言符瑞昌大喜乾寧二
年即偽位國號大越羅平建元曰天冊

通鑑作改
元順天

自稱

聖人鑄銀印方四寸文曰順天治國之印榜南門曰天
冊樓先是州寢有赤光長十餘丈咫長尺餘金色見思
道亭昌署寢曰明光殿亭曰黃龍殿以自神以次拜置
百官初官屬不徇昌旨者節度副使黃碣會稽令吳鐔
據通鑑
增輯山陰令張遜皆誅死鎮海節度使錢鏐書讓昌

曰閉城作天子取滅族禍豈若開門作節度終身富貴
耶願王改圖昌不聽鏐悉兵三萬攻之望城再拜曰大
王位將相奈何舍安就危能改過請諭還諸軍昌懼致

犒軍錢二百萬緡執應智王溫韓姐吳繇秦昌裕送於
鏐且請待罪天子鏐乃還表於朝以為昌不可赦復討
之傳城而壘昌又執朱思遠王守真盧勤送鏐軍求解
昭宗遣中人李重密勞師削昌官爵授鏐浙東道招討
使昌乃求援於淮南楊行密行密遣將臺濛圍蘇州
安仁義田頴攻杭州以救昌鏐將顧全武許再思等數
敗昌軍昌將多降遂進圍越州侯人言外師彊輒斬以
徇紹告鏐兵老皆賞全武等益奮昌軍大潰遽還去偽

號全武四面攻未克會臺濞取蘇州鏐召全武還全武
曰賊根本在甌越今失一州而緩賊不可攻益急城中
以口率錢雖簪珥皆輸軍昌從子真得士心昌信讒殺
之衆始不用命又減戰糧欲犒外軍下愈怨反攻昌昌
保子城鏐遣昌故將駱團八見紿言奉詔迎公居臨安
昌信之全武執昌還及西江斬之投尸于江傳首京師
夷其族斬偽相李邈蔣瓌等百餘人發昌先墓火之昌
敗猶積糧三百萬斛金幣大抵五百餘帑而兵不及萬

人鏐遂為鎮海鎮東兩軍節度云

欽定續通志卷六百二十九